

Carta nu cuítí naca_hyí Pablo nuú Timoteo

Chíndahá Pablo Ndióxi coo Timoteo

1 Yehe cúú Pablo, da cúú in apóstol cuéntá Jesucristo sahá ña nasahnda Ndióxi xihín Jesucristo chuun yóho nuú i. Ta Ndióxi cúú á ña jácacu mí ta Jesucristo cúú á ña ndátí quixi. ²Cáhyí i carta yóho nu mún, Timoteo jáchi cúún tátuhun jahyi maní i sahá ña cándéé inún Jesucristo. Ta cúni ña ná cajú Ndióxi, tátá yo xihín Jesucristo, xitoho í cuahá ñamaní xuhun. Ta ná tahvi ini a sahun ta ná cajú ña ná coo vaha inún.

Ndícani Pablo sahá na co jánaha ña ndaa

³Tá jalóho cámaní quee e ñuu Efeso quixi i estado Macedonia yóho já naxica tahví i nuun ña ná candoún ñuu Efeso jan. Ta viti xica tahví tucu u nuun ña ná coún cán. Jáchi ndúu java ñayivi cán ta jánaha na ña tuhún nuú ñayivi. Ta ndítahan nu mún cahndún chuun nu ná ña ná a jánaha ga na ña tuhún. ⁴Ta ná a táa johó na cuento nání, ña cáhan sahá chichi naquixi tásáhu jícó yo. Jáchi nditúhún uun va na sahá ña yóho ta co chindeé a na cándéé ini na Ndióxi, mé á nasacu ini jácacu a mí.

⁵Ndítahan cahún ña yóho xihín ná jáchi cúni Ndióxi ña ná quihvi ini táhan í xihín ndihi ínima yo ta cúni a ña ná cajú í ña vaha cuití va ta cúni a ña ná cándéé iní mé á xihín ndinuhu iní. ⁶Joo java ñayivi najándicoo na ña ndaa ta najátiví na ña cajú na jáchi ña quihví cuití va nditúhún xihín táhan na. ⁷Vatí cúni na cán jánaha na ley Moisés joo co cándaa ini na ña jánaha na ta ni co cándaa ini na ña cáhan mé ley.

⁸Joo sa xini yo ña mé ley Moisés cúú á ña vaha tá ná cajú chúun vaha í ña tá quiahva cúni Ndióxi. ⁹Xíní ñúhú ndícuhun iní ña ni in ley co chícáan cuachi jatá ñayivi vaha. Joo chícáan cuachi jatá ñayivi quini, na sáa ini jáchi co cajú na ña cúni Ndióxi. Ta chícáan cuachi jatá ñayivi núu, na cajú cuahá nuú cuachi. Ta chícáan cuachi jatá ñayivi co cajú cáhu Ndióxi, na cánahá xihín mé á. Ta chícáan cuachi jatá ñayivi sáhní tátá náná na xihín jatá tóco ndihi na sáhní ndii. ¹⁰Ta chícáan cuachi jatá ñayivi ndúu xihín taa á ñaha, na co cúú yí ná á ñájíhí na. Ta chícáan cuachi jatá taa líhi, da quihvi nuu xihín inga taa. Ta chícáan cuachi jatá na cajú cuíhná ñayivi

sahá ña cúnì nà jicó ñahá nà. Ta chícāan cuachi jatá ñayivi cáhan ña tuhún, mé nà janda quivì Ndióxi tává nà tá cáhan nà ña tuhún. Ta chícāan cuachi jata tóco ndihi ñayivi tá co cája na ña ndaa, ña jánaha Ndióxi nu yó caja í. ¹¹Ta nasahnda Ndióxi chuun nuú i ña ná jánaha i ña ndaa yóho nu ndo jáchi cúnì a jácacu a tóco ndihi ñayivi. Cáhnu ndivaha cúu mé á ta ndítahan caja cáhnu í mé á.

Ndiquiahva Pablo ndixahvi nu Ndióxi jáchi táhnda ini a saha dá

¹²Ndiquiahva i ndixahvi nu Jesucristo, xitoho í jáchi nacaxi a yehe caja chúun i cuéntá mé á ta nasahan mé á tuhun ndée ini i ña ná caja i ña xihín ndinuhu ini i. ¹³Vatí jihna nacahan ihvi i saha Ndióxi ta nacaja xixi i xihín á ta nacanahá i xihín á joo nacaxi a yehe. Ta natahnda ini a sahá i tá cámani candeé ini i Jesucristo jáchi coo nacandaa ini i ña nacaja i. ¹⁴Nacaja Ndióxi cuahá ñamani xihín i tá nacaja ña ná candeé ini i mé á. Ta nacaja mé á ña nachutú ndaa ini i xihín ña quíhvi ini i na cúu cuéntá mé á sahá ña in nanduu u xihín mé á.

¹⁵Ña yóho cúu á ña ndaa ta ndítahan nuú ndihi ñayivi candúsa na ña cáchi i yóho: naquixi Jesucristo ñuyíví yóho jácacu a ñayivi, nà cája cuachi. Ta yehe cúu u da yójó nu ndíhi nà cája cuachi. ¹⁶Ta sahá ña yóho natahvi ini Ndióxi sahá i já ná cuu naha Jesucristo ndaja cáhnu coo ini mé á. Ta vatí nacaja cuaha chága i cuachi a juú ga java ga ñayivi joo já nasacuu u yuhú nuú tóco ndihi na vaxi chága chí nuu ña ná candeé ini na mé á ta já coo na xihín mé á anda ama cáa quivì. ¹⁷Ña cán quea cóho caja cáhnu í Ndióxi anda ama cáa quivì jáchi mé á cómi a cuéntá saha yo anda ama cáa quivì. Ta mé Ndióxi a cuú quivi a ta ndíchí ndivaha jinì á ta fin a indiví vatí a cuú cuní a. Cáhnu ndivaha cúu mé á. Já ná coo.

¹⁸Candehún Timoteo, da cúu tátuhun jahyi mí i. Jándacoo i chuun yóho nu mún jáchi quiahva já nacachi profeta sahún jihna. Ta xíní ñúhú quiahva ndee inún cajún ña jáchi cúu á tátuhun cáni táhún xihín ña núu. ¹⁹A jándacoún ña candeé inún Jesucristo ta xihín ndinuhu inún cajún ña ndaa. Jáchi java ñayivi coo nacaja na ña xínì nà cúnì Ndióxi caja na ta chí nandihì sahá ña candeé ini na Jesucristo. ²⁰Ivi táhan da cán cúu Himeneo xihín Alejandro. Nandiquiahva i da cán ndáha tiñáhá sacuahá va já ná candaa ini da ña a cuú quehe núu da Ndióxi xihín tuhun cáhan da.

Ndaja caja í caca tahví yo nu Ndióxi

2 Ña xíní ñúhú chága caja ndó quea caca tahví ndó nu Ndióxi sahá ndihi ñayivi ña ná tahví ini a saha ná. Ndiquiahva ndó ndixahvi nu Ndióxi sahá ñamani cája mé á xihín ndó. ²Ta sa mé quiahva já ndítahan caca tahví ndó nu Ndióxi saha tóco ndihi nà cómi cuéntá saha yo. Jáchi tá cája í

ñā yóho já cuu coo vaha iní xihín ndihi ñayivi ta já coo toní ñúhú xihín táhan í. Ta já núná nū yō caja cáhnu í Ndióxi. ³Tá xíca tahví yō nū Ndióxi sahá ndihi ñayivi já quéa cája í ñā vaha ta cájii ini Ndióxi, mé á jácacu mí. ⁴Jáchí cúní a jácacu a tóco ndihi ñayivi ñā ná candaa ini na ñā ndaa saha mé á. ⁵Jáchí íin in tálaá Ndióxi. Ta íin in tálaá Jesucristo, mé á cúú á taa ta cája mé á ñā ná ndique táhan máni ñayivi xihín Ndióxi. ⁶Ta nandiquiahva Jesucristo mé á quivi a sahá cuachi tóco ndihi ñayivi. Xihín ñā yóho náha Ndióxi nū yō ñā nandindaa tiempo tá cúní a jácacu a tóco ndihi ñayivi. ⁷Sahá ñā cán quéa nacaxi Ndióxi yehe cacuu u apóstol ñā ná caxi tuhun i tuhun vaha sahá Jesús nuú na tóho, na co cúú na Israel. Jáchí cúní Ndióxi ñā ná candaa ini na ñā ndaa já ná cuu candeeé ini na Jesús. Cáhan i ndinuhu ñā ndaa xihín ndo ta co cáhan i ñā tuhún xihín ndo.

⁸Ñā cúní quéa ná caca tahví nataa nū Ndióxi tóco ndihi nū táca ndo. Ta ndítahan nū ná coo vií ínima ná já ná cuu ndínehe na ndáha ná nū Ndióxi. Ta ndítahan nū ná jándicoo na ñā xójo ini na ta ná a cáni táhan yúhu ná. ⁹Jári co ndítahan nuú najihí candixi na jahmá lándā. Ta ná a cája lándā ná xihín ijí jini ná. Ta ná a ndíhi ini na caja cutú na mé ná xihín ñāha jiuhun cuáán á xihín jíqui yahvi tátuhun perla. Ta ná a cándixi na jahmá yahvi ñā cája lándā ná xihín. ¹⁰Vaha chága ná caja na ndinuhu ñā vaha tá quiahva ndítahan nuú najihí, na cúú cuéntá Jesús caja na. ¹¹Ndítahan nuú najihí canduu táji ná cuni johó na tuhun Ndióxi ta coto ná a ndínehe jícó na mé ná. ¹²Ta co sáhan i ñamaní nuú najihí ñā ná jánaha na nū táca ñayivi. Ta ni co sáhan i ñamaní nū ná ñā ná cacomí na cuéntá sahá dataa. Joo ndítahan nū ná coo táji ná. ¹³Jáchí jihna ñúhú nacavaha Ndióxi Adan ta anda jáví nacavaha mé á Eva. ¹⁴Ta a juú Adan cúú da najándahvi tiñáhá sacuahā, vaha. Joo najándahvi tiñáhá sacuahā Eva ta já nandicava ñā nuú cuachi. ¹⁵Sahá ñā cán quéa nacaja Ndióxi xihín najihí ñā ná ndoho ini na tá cacu jahyi na. Joo jácacu Ndióxi na tá ná a jándacoo na ñā cándeé ini na mé á. Ta já ndítahan nū ná quihvi ini na ñayivi. Ta ná a cája lándā ná ta ná ndiquiahva vií na mé ná ndáha Ndióxi.

Ndaja ndítahan caja na sacuahā nuú na cúú cuéntá Jesús

3 Ta ñā ndaa cúú tuhun yóho: ndá da cúní cacuu da sacuahā nuú na cúú cuéntá Jesús, ñā vaha quéa cúní da. ²Jáchí ndítahan nuú da sacuahā caja da ndinuhu ñā ndaa já ná a ñéhe íní ñayivi cahan núu na saha dá. Ta in túhún ñájihí da ndítahan coo. Ta ndítahan cacuu da da tácu ini ta ndítahan nū dá cañehe vaha da quiahva ta ndítahan cacuu da da íin toní ñúhú ñayivi xihín. Ta ndítahan nū dá cajii ini da ndiquehe vaha da ñayivi vehe da. Ta xíní ñúhú cacuu da da tiaha vaha jánaha da ñayivi. ³Co ndítahan cacuu da da xihí ta co ndítahan cacuu da da ndúcú cuachi xihín

ñayivi. Joo ndítahan coo vií da xihín ñayivi ta ná a cáni táhan da xihín ná. Ta co ndítahan cacuu da da ndiáva ini quehe cuahá da jiuuhún. ⁴Ta ndítahan nuú da sacuahá cacomí vaha da cuéntá sahá na vehe da. Ta ndítahan nuú jahyi da coo johu na nu cáhan tátá na xihín ná ta ná coo toní ñúhú na xihín dá. ⁵Jáchí tá ta a cúu cañehe vaha da cuéntá sahá na vehe da já quéa a cúu caja da cacomí da cuéntá sahá na cúu cuéntá Jesús. ⁶Ta mé da sacuahá co ndítahan cacuu da da jacá nandihvi íchi cuéntá Jesús. Jáchí tiahva náa casahá da ndiñehe jícó da mé dá ta sahá ña yóho jándoho Ndióxi ini da tá quiahva nacaja mé á xihín tiñáhá sacuahá. ⁷Mé da sacuahá nuú na cúu cuéntá Jesús yóho ndítahan cacuu da da íin toní ñúhú ñayivi, na co cúu cuéntá Jesús xihín. Jáchí tiahva náa ndicava da ndáha tiñáhá sacuahá ta xihín ña yóho cahán núu ñayivi ñuyíví sahá dá.

Ndaja ndítahan caja na tá ná chindeé na na sacuahá veñuhu

⁸Ta ndá da cúni cacuu da chindeé na sacuahá veñuhu ndítahan nu dá cacuu da da íin toní ñúhú ñayivi xihín. Ta xíní ñúhú cacuu da da cáhan ndinuhu ña ndaa. Co ndítahan cacuu da da xihí ta co ndítahan nu dá cacuu da da ndiáva ini coo cuahá jiuuhún nuu. ⁹Ta xíní ñúhú tiin tuun da ña ndaa ña nanahá Ndióxi nu yo ta ña yóho cúu á ña ndítahan candeé iní mé á. Ta ná a cáhvi ivi johu ini da. ¹⁰Jihna ñúhú xíní ñúhú coto ndojó ndo mé da cúni chindeé na sacuahá veñuhu. Ta tá co cája da cuachi nu Ndióxi já quéa cuu chindeé da na sacuahá veñuhu. ¹¹Ta jári najihí viti ndítahan cacuu na na íin toní ñúhú ñayivi xihín. Co ndítahan cacuu na na ndahnda yúhu. Ná cacuu na na ndísáhnú ini ta ná caja chúun na xihín ndinuhu ini na. ¹²Ta mé da chindeé na sacuahá veñuhu ndítahan nu dá cacuu da da coó inga ñáha xihín ta in túhún ñájihí da ndítahan coo. Ta ndítahan nu dá cacomí vaha da cuéntá sahá jahyi da xihín sahá ndihi na vehe da. ¹³Jáchí tá ná chindeé vaha da yóho na sacuahá veñuhu já casahá cahvi vaha ini ñayivi sahá dá ta xihín ña yóho ñehe iní da cahán chága da sahá ña candeé ini da Jesucristo.

Cáhan Pablo sahá ndá a cúu mé Jesucristo

¹⁴Vatí ndúcú u saa yachi i jan joo cáhyí i carta yóho nuun. ¹⁵Jáchí tá ná cacuáchi loho i saa i jan já quéa sa cándaa inún xihín carta yóho ndaja ndítahan caja mí, na cúu na vehe Ndióxi. Mé a ndaa cúu yó cuéntá Ndióxi, mé á tácu ta ndítahan nu yo quiahva ndeé iní ndiquehé sahá ña ndaa cáhan sahá Jesucristo. ¹⁶Jáchí mé a ndaa cáhnú ndivaha cúu ña náha Ndióxi nu yo:

Naquixi Jesucristo ñuyíví yóho ta nasacuu a ñayivi.

Ta nacahan ínima yii Ndióxi sahá mé á ña coó nacaja ni in cuachi.

Ta naxini táto Ndióxi Jesús.

Ta ndijáá ñuyívi naçaxi tuhun na tuhun vaha saha mé á ta cuaha ndivaha ñayivi nacandee ini na mé á ta tá nandihí nandaa cuahan indiví.

Cáhan Pablo sahá na co jánaha ña ndaa

4 Cáhan cáxi ínima yíi Ndióxi ña vaxi quívi jándacoo java ñayivi ña candeé ini na Jesús. Ta casáhá na candico na na jándahvi ñahá, na jánaha ña naquixi nuú tiñáhá sacuahá. ²Ta mé na jánaha ña tuhún yóho co cúu ná tá quiahva ndáa na. Jáchí cúu ná ñayivi túhún, na nandaji xíní túni xihín ña núu. ³Ta jánaha na yóho ña a cuú tandaha ñayivi ta jánaha na ña a cuú cuxu ñayivi java ñaha, ña nacavaha Ndióxi cuxú. Joo cúni Ndióxi ña ná cuxú ña jan tá ná ndiquiahva í ndixahvi nu mé á sahá jáchí candeé iní mé á ta xíní vaha í ña ndaa. ⁴Jáchí tóco ndihí ña nacavaha Ndióxi cúu á ña vaha ta ni in ñaha co ndítahan candají yo. Joo ná ndiquehe vaha í ña ta ná ndiquiahva í ndixahvi nu Ndióxi sahá. ⁵Jáchí tá ná caca tahví yo nu Ndióxi já caja yíi mé á ña xihín tuhun mé á.

Ña ndítahan caja da cája chúun vaha cuéntá Jesucristo

⁶Tá ná jánahún ña yóho nuú na cúu cuéntá Jesús já queá caja chúun vahún cuéntá mé á. Ta quiahva ndeé inún tá jácuaha chágún ña ndaa sahá Jesucristo já ná candico cáhnu chágún íchí cuéntá mé á. ⁷Coto a táa johún cuento ña cáhan ñayivi ñuyívi jáchí coó saha toho ña jan. Ña ndítahan cajún queá jácuaha chágún ndá quiahva caja cáhnún Ndióxi. ⁸Tá ná caja chúun cuaha í xihín yiquí cuñu í já queá chindeé a mí ñuyívi yóho cuití va. Joo tá ná caja cáhnu í Ndióxi já queá chindeé chága yó mí jáchí xihín ña yóho cuu coo vaha iní ñuyívi yóho ta sa xihín mé ña yóho cuu coo vaha í xihín Ndióxi tá ná cūhūn yó coo í xihín mé á. ⁹Ta ña yóho cúu á ña ndaa ta xíní ñúhú candúsa í ña. ¹⁰Ta sa saha mé ña ndaa yóho cája chúun vaha í jáchí candeé iní Ndióxi, mé á tácu. Mé a cán cúni a jácacu a tóco ndihí ñayivi ta mé a ndaa jácacu a tóco ndihí na candeé ini mé á.

¹¹Ta xíní ñúhú jánahún nuú ñayivi tóco ndihí ña cáchí í xuhún yóho ta xíní ñúhú cahndún chuun nu ná ña ná caja na ña. ¹²Coto a quiahvún ñamaní nuú ñayivi quehe núu na yohó sahá ña cúun da yúta. Joo xihín ña cájún xíní ñúhú jánahún nuú na cúu cuéntá Jesús ndá quiahva ndítahan caja na ta ndá quiahva ndítahan cahan na. Ta xíní ñúhú jánahún nu ná ndá quiahva ndítahan quihvi ini na ñayivi ta ndá quiahva ndítahan candeé ini na Ndióxi. Ta víi uun cajún tóco ndihí ñaha já ná a cáhvi núu ini ñayivi sahun. ¹³Nani ndátún saa í jan xíní ñúhú cahvún tuhun Ndióxi nuú na cúu cuéntá Jesús nu táca na. Ta quiahvún tuhun ndeé ini na ta jánahún na.

¹⁴Coto a ndíndójún sahá ña nasahan Ndióxi nuun tá naxica tahví na cúu profeta nu mé á sahun tá nachojó na sacuahá ndáha ná jinun.

¹⁵Xihín ndinuhu inún caja chúun cuéntá Ndióxi já ná cuu cuni tóco ndihi ñayivi ndá quiahva xica vahún xihín ñaha Ndióxi. ¹⁶Cuéntá vaha coún xihín mún ta cuéntá vaha coún xihín ña jánahún nuú ñayivi. Ta xíní ñúhú coo ndacú inún xihín ndihi ña cajún. Jáchi tá ná cajún ña yóho já queá cacu ndaa ínimun ta jári cacu ndaa ínima na xíní johó nu cáhun.

Jánaḥa Pablo nu Timoteo ndaja ndítahan caja da xihín na cúu cuéntá Jesús

5 Co ndítahan jananún da sáhnú. Ña ndítahan cajún queá jácahun dá tá quiahva cáhun xihín tátún. Ta xíní ñúhú cajún xihín da yúta chága tá quiahva cájún xihín ñanún. ²Ta xihín na sáhnú xíní ñúhú cajún tá quiahva cájún xihín nánún. Ta xihín na tacú xíní ñúhú cajún tá quiahva cájún xihín quiahvún. Vií uun cajún xihín ná ta a cáhvi núu inún saha ná.

³Xíní ñúhú chindeé ndó na cuáan tá co ndíní cúu na tá ta coó na vehe na. ⁴Joo tá íin in ña cuáan ta ndúu jahyi ña á ndúu jahyi ñání ña já queá ndítahan nuú na cán chindeé na ña. Jáchi táhán ini Ndióxi xihín ñayivi tá chindeé na tátá náná na ta xihín ña yóho चाहvi na ñamani nacaja tátá na xihín ná tá najacuahnu ñahá na. ⁵Jáchi mé ña cuáan ña mé a ndaa coó na vehe ña chindeé na ña mé ña cán cúu ña cándéé chága ini ña Ndióxi. Ta ñuú ta ndiví xica tahví ña nu mé á ña ná chindeé a ña. ⁶Joo ña cuáan, ña cája ña núu ña cúní mé cuití ña, ña cán cúu ña tátuhun ndii vatí tácu ña. ⁷Ña cúní queá ná cahndún chuun yóho nuú na cán já ná a ñéhe íní yo jananí na. ⁸Jáchi ndá na co chindeé na táhan na ta ni co chindeé na na vehe na já queá náha cáxí a ña co cándéé ini na Jesucristo ta janda núu chága cája na a juú ga na co cúu cuéntá Jesús.

⁹Tá ndúu na cuáan ta tá cúní na chindeé na na sacuahá veñuhu já queá cahyún quiví ná nuú tutu. Xíní ñúhú cacuu na na naxinu uní jícó cuia á chága ta xíní ñúhú cacuu na na nasahin xihín in túhún yí. ¹⁰Mé na yóho xíní ñúhú cacuu na na cáhan vaha ñayivi sahá ña vaha cája na. Tátuhun tá nasandaa vaha na jahyi na á tá nandiquehe vaha na ñayivi xínu coo vehe na. Ta xíní ñúhú cacuu na na cája ndiví nuú na cúu cuéntá Jesús. Ta ndítahan coo tiaḥva na chindeé na ñayivi tá ndóho ini na. Tá cája na ña yóho xihín java ga ñaha vaha já cuu quehe ndó na ná chindeé na na sacuahá veñuhu.

¹¹Joo a cáhyí tohún nuú tutu jan quiví na cuáan, na yúta chá jáchi tiaḥva náá casáhá ndiava ini na tandahá tucu na ta anda jáví jándicoo na chuun cája na cuéntá Jesucristo. ¹²Ta xihín ña yóho cája na cuachi nu Ndióxi jáchi coó najáxinu coo na tuhun nasahan na nu Ndióxi. ¹³Ta jári casáhá xica nuu na tá vehe tá vehe ta ndúu na na jusá. Ta a juú ña cán

cuití va vaha jáchi cásahá nā ndahnda yúhu ná ta quíhvi nuu na nuú co ndítahan coo na ta cásahá cáhan nā ña co ndítahan cáhan nā. ¹⁴Sahá ña cán quéa cáchí i xuhun ña vaha chága ná tandahá najihí cuáan, nā yúta ta ná cacu jahyi na ta ná candaa vaha na vehe na. Ta xihín ña yóho a quiahva toho na ñamaní nuú nā ihvi yo cáhan núu na saha ná. ¹⁵Jáchí ndúu java najihí cuáan ta sa nacaxoo na nu íchi cuéntá Jesús ta nacasáhá nā ndíco na tiñáhá sacuahá.

¹⁶Joo ndóhó, nā cúú cuéntá Jesús tá iin ña cuáan nu ndo ndítahan chindeé mé ndó ña já quéa ná nuná nuú java ga nā cúú cuéntá Jesús chindeé nā nā cuáan, nā coó nā vehe.

¹⁷Nā sacuahá, nā cája chúun vaha na veñuhu ta cómi nā cuéntá sahá na cúú cuéntá Jesús, nā cán cúú nā ndítahan ndiquehe cuahá chága yahvi sahá chuun cája na. Ta chága ví tá xica nuu na jánahá nā tūhun Ndióxi nuú ñayivi. ¹⁸Jáchí já cáchí tūhun Ndióxi já: “A chícāun ñúnu yuhú tīndiqui nani cája chúun rí sání rí trigo. Joo xíní ñúhú quiahvún ñamaní nu rí caxí rí ña.” Ta iin inga tucu nu cáchí a: “Da cája chúun ndítahan quehe da yahvi sahá chuun cája da.”

¹⁹A cándúsa tohún nā chícāan cuachi jatá in da sacuahá veñuhu tá ta co ndúu ivi á uní testigo nā sáhan tūhun sahá ña nacaja da cán. ²⁰Joo ndá nā co cúni jándacoo cuachi cája na já quéa xíní ñúhú jánanún nā nu táhyí ndihi nā cúú cuéntá Jesús já quéa ná cayihví nā java cán caja na cuachi. ²¹Nu Ndióxi ta xihín nu Jesucristo xitoho í ta xihín nu táto Ndióxi sáhdá i chuun nu mún Timoteo ña ná cajún ña nacahyí i yóho. Tá jánanún in da cúú cuéntá Jesús sahá cuachi cája da xíní ñúhú jánanún da vatí cúú dá da xíní táhan vaha xuhun. ²²Coto a chójó yachún ndáhún jiní in da cúni cacuu da sacuahá nuú nā cúú cuéntá Jesús. Jáchí nu cuítí xíní ñúhú ndicani vaha inún sahá ña cájún. Jáchí tá ná caja da cán cuachi já quéa cáhan java ñayivi ña iin vaha inún xihín cuachi cája da. Coto a cájún ña núu.

²³Ta sahá ña já cuití quíhvi tisún sahá ña cán co ndítahan cohún ticuí uun va. Joo ndítahan coho lohún vino.

²⁴Ndúu java ñayivi ta náha cáxí táhyí cuachi cája na nuú ñayivi vatí cámaní nahma nā ña. Joo ndúu java ga ñayivi ta ñúhu jehé cuachi na joo vaxi quiví tá ndacanáhá cuachi na. ²⁵Ta sa mé quiahva já ndacanáhá cáxí táhyí ña vaha cája java ñayivi. Ta vatí ná caja jehé nā ña vaha joo vaxi quiví ndacanáhá nuú ña vaha nacaja na.

6 Ta ndúuna cúú cuéntá Jesús ta cómi xitoho na cuéntá saha ná já quéa xíní ñúhú caja cáhnu na xitoho na xihín ndinuhu ini na já ná a cáhan núu ñayivi sahá quiví Ndióxi ta ni ná a quéhe núu na ña jánahá nde. ²Ta tá ndúu java na ta xitoho na cúú dá cuéntá Jesús já quéa xíní ñúhú caja

cáhn̄u na xitoho na sahá ña cúú da cán da candeé ini Jesús. Ña ndítahan caja na cán queá caja ndíví vaha chága na nu sáhndá xitoho na caja na jáchi xíní ñúhú ndicuhun ini na ña tá cája ndíví vaha na nuú da cán já queá cája ndíví vaha na nuú ñani mání ná, da cúú cuéntá Jesús. Ña yóho queá xíní ñúhú jánahún nuú ñayivi ta xíní ñúhú cahndún chuun nu ná ña ná caja na ña.

Ñayivi, na jánah̄a ña co cúú ña ndaa

³Ta ndá ñayivi tá jánah̄a na ña co cúú ña ndaa, ña co ndíque táhan vaha xihín tuhun nacahan Jesucristo, xitoho í nu yó ta ni co ndíque táhan vaha xihín tuhun Ndióxi ⁴já queá na cán cúú ná na ndíñehe jícó ndivaha mé ta co xíní na ni in ñaha. Ndiáva ini na cani táhan yúhu ná ta cásáhá cáhiv̄i ini na xihín ñayivi ta ndícuehe xihín táhan na. Cánahá na xihín ñayivi ta co candeé ini táhan na. ⁵Ta co jándacoo na ña cáni táhan na sahá ña najaca xíní tún̄i na ta nandindójó na ña ndaa. Ta cúni na ndicuícá na xihín ña jánah̄a na nuú ñayivi sahá Jesús. Candehún. Xíní ñúhú caxoún nuú na cán. ⁶Vatí mé a ndaa tá ndíco yó íchi cuéntá Jesús cúú yó na cuicá ndivaha nani íin vaha iní xihín ña cómi yo. ⁷Jách̄i coó ñaha ñéhé tá naquixí ñuyíví yóho ta ni coó ñaha cuu cañehé coh̄o tá ná quiví. ⁸Sahá ña cán queá tá íin ña cuxú ta tá íin ña candixí já queá ndítahan coo vaha iní. ⁹Joo na cúni ndicuícá co candeé na cahnu na nuú ña cúni yiquí cuñu na ta já ndícava na nuú cuachi. Ta xihín ña yóho cásáhá ndícaj̄i ini na caja na cuahá nuú ña núu. Ta cája ña yóho ña ná ndihi saha ná. ¹⁰Ta sahá ña cátóó ndivaha ñayivi jiuhún sahá ña cán queá quixi cuahá ña núu jiní ná. Ndúu java na najándacoo na ña candeé ini na Jesús sahá ña cátóó na jiuhún. Ta sahá ña yóho nacasáhá ndóho ini na janda nuú co ndéé ga ini na.

Ndítahan nuú na cúú cuéntá Jesús candíco cáhn̄u na mé á

¹¹Candehún, Timoteo, da cúú cuéntá Ndióxi. Xíní ñúhú caxoún nuú tóco ndihi ña núu já ná candíco cáhnún íchi cuéntá ña ndaa. Cajún ña vaha, ña cúni Ndióxi ta candeé inún Jesús. Xíní ñúhú quih̄vi inún ñani táhún. Quiahva ndeé inún tá ndóho inún ta vií cajún tóco ndihi ñaha. ¹²Xíní ñúhú candíco cáhnún íchi ña candeé inún Jesús. Coto a jándacoún íchi ña cañehe yohó cuhún coún indiví xihín Ndióxi. Jách̄i saha mé ña jan nacana Ndióxi yohó tá nacaxi tuhún nuú cuahá ñayivi ña candeé inún Jesucristo. ¹³Nu Ndióxi, mé á cája ña tácu tóco ndihi ñaha ndúu ñuyíví, xihín nu Jesucristo, mé á coó nayih̄ví cah̄an ña ndaa tá nasandichi a nu Poncio Pilato, nu ndíví a cán sáhndá i chuun nu mún, Timoteo ¹⁴ñá ná cajún xihín ndinuhu inún tóco ndihi ña sáhndá Ndióxi nuun. Ta coto a ndíjama tohún ña jáchi quiahva já ñehe ín̄i ñayivi jánaní na yohó. Ta xíní ñúhú cajún ña

yóho janda quiahva ná tandaa quivi quixi tucu Jesucristo, xitoho í. ¹⁵Ta tá ná xinu coo quivi nasacu ini Ndióxi já caja mé á ña ná coo tóco ndihi ña yóho. Jáchí in túhún Ndióxi cúu á ña yí ta cúu á xitoho nu tóco ndihi ñaha. Ta mé á cúu á jini nuú in in da cómí cuéntá sahá ñayivi ndúu ñuyíví. Ta mé á cúu á xitoho nuú ndihi da cúu xitoho nuú ñayivi ndúu ñuyíví.

¹⁶Mé á cúu á in túhún jini Ndióxi, ña a cúu quivi. Ta ni in ñayivi a cúu cativi yati nu íin mé á jáchí yéhe ndivaha nu íin mé á. Ta ni in ñayivi ndúu ñuyíví coo naxini na mé á jáchí a cuú cuni ñayivi Ndióxi. Ndítahan caja cáhnu í mé á anda ama cáa quivi jáchí a ndíhi toho sahá ña sáhdá mé á chuun. Já ná coo.

¹⁷Ndítahan nu mún, Timoteo cahndún chuun nuú na cómí cuahá ñaha cuíca ñuyíví yóho ña ná a cácuu na ñayivi catóo ndínehe jícó mé. Ta xíní ñúhú cahndún chuun nu ná ña ná a cándéé ini na ñaha cuíca cómí na jáchí cuu ndihi sahá tóco ndihi ñaha cómí na. Ña ndítahan caja na quea cándéé ini na Ndióxi, mé á quiahva tóco ndihi ñaha nu yo já ná cají íní yo.

¹⁸Cahndún chuun nu ná ña ná caja vaha na ta ná cajojó johó ña vaha cája na. Ta xíní ñúhú coo tiaha na cahnda java na ña cómí na xihín java ga ñayivi. ¹⁹Jáchí xihín ña yóho ñehe táhvi ná coo cuahá ñaha cuíca na indiví tá ná tandaa quivi cūhun na coo na xihín Ndióxi anda ama cáa quivi.

²⁰Candehún Timoteo. Xíní ñúhú quehe cuéntá vahún ña jánaha i nuun. Coto a cúni johún tuhun ña cáhan ñayivi ñuyíví jáchí coo sahá toho a ta ni co xíní na ña cáhan na sahá. ²¹Jáchí java na cán cáhí na xíní ndivaha na joo najándacoo na ña cándéé ini na Ndióxi.

Ná caja Ndióxi cuahá ñamaní xihín ndihi ndó. Já ná coo.